

Padah miliki syabu, lelaki didenda RM2,900

MIRI: Padah memiliki dadah berbahaya jenis syabu, seorang lelaki didenda RM2,900 atau tiga bulan penjara oleh Mahkamah Majistret di sini, semalam.

Hukuman itu dijatuhkan Majistret Ashok Linggam setelah meneliti beberapa aspek termasuk pengakuan bersalah tertuduh telah menjimatkan masa dan kos mahkamah, rayuan, fakta kes, keseriusan kes serta mengambil kira kepentingan awam.

Tertuduh, Winston Tinggang, 24, dari Long Teran Kiri, Tinjar, Baram, didakwa mengikut Seksyen 12(2) Akta Dadah Berbahaya (ADB) 1952 dan dihukum di bawah Seksyen 12 (3) akta yang sama.

Jika sabit kesalahan, tertuduh boleh dikenakan denda tidak melebihi RM100,000 atau penjara hingga lima tahun atau kedua-duanya sekali.

Berdasarkan fakta kes, tertuduh bukan sebagai seorang yang diberi kuasa di bawah ADB 1952, didapati memiliki dadah berbahaya jenis Methamphetamine (syabu) seberat 0.08 gram.

Tertuduh didakwa melakukan kesalahan itu pada jam 2 petang, 23 Mei 2025 di hadapan sebuah bilik tidak bernombor di Jalan Desa Pujut, Bandar Baru Permyjaya di sini.

Dalam rayuannya, tertuduh memohon hukuman ringan dengan alasan ini adalah kesalahan pertamanya.

Pendakwaan kes dikendalikan Inspektor Mudzilawati Abdul Rahman manakala tertuduh tidak diwakili peguam bela.